

DE
MVTVIS PATRONORVM
AC
CLIENTIVM AD DISCIPLINAM
ROMANORVM OFFICIIS

BREVITER DISPVTAT
ET
ACTVM ORATORIVM
IN

REGIO ILFELDENSI PAEDAGOGIO
AD D. XX. AVGVSTI MDCCLXXI.

HABENDVM
INDICIT
M. CAROL. FRIEDER. MEISNER
RECTOR.



GOETTINGAE,
APVD IOH. CHRIST. DIETERICH.




In concordiae civilis, rei ad rerumpublicarum salutem & fortunas unice necessariae, praesidiis haud exiguum illud mihi semper visum est, quod Romulus, fundator imperii, omnium quorum memoria exstat potentissimi, vel ipse excogitavit, vel ab aliis mutuatum, in novam suam rempublicam transtulit, per quod Patres & Plebem mutuis inter se officiorum vinculis copulavit, cum illos plebeiorum suscipere patrocinium, hos autem juberet, sibi quem vellent ex patriciis eligere, cuius se tutelae & fidei potissimum crederent.

Totum illud Romuli institutum Dionysius Halicarnassensis *a)* late, brevius Plutarchus *b)* persequitur; at Livius, quod iure quis miretur, prorsus non attingit, cum tamen narrationibus, quibus nonnunquam plus, quam velis, indulget fabulosis, potior utique videri possit rei ad Romanae civitatis statum inprimis memorabilis expositio.

Dio-

a) Antiquat. Roman. lib. 2. p. m. 83. sqq.

b) in Romulo p. m. 40. sqq.



Dionysius, rei originem expliciturus (verba ipsa ad marginem dabimus) morem ait c) Graecum & antiquum illum esse, quo Thessali etiam & prisca Athenienses usi sint. " Apud Athenienses (cum Solone haud dubie Romulus antiquior sit) ex Thesei, vel Erechthei adeo, aut Cecropis institutione illam civium in ordines divisionem ortam esse reor; probabile tamen fit, eosdem viros eam non primos excogitasse, sed ab Aegyptiis mutuasse, etsi meliorem, quam Aegyptii, rationem secuti sunt, cum in depressa & inferiore conditione natos, ab spe in altiore ordinem enitendi, & magistratus capiendi non omnino arcerent. Arguit tamen nihilominus eos Halicarnasseus, quod pauperes & inferiores cives, iniungendo ipsis, quae ingenuos & liberos non decerent, & verbera intentando minus obsequiosis, eosque servorum & mancipiorum instar habendo; ignominioso denique *θητῶν* seu mercenariorum & operariorum nomine appellando, durius quam par esset habuerint. *Penestiarum* apud Thessalos, quorum Dionysius ineminit, in Athenaeo d) amplior est mentio, qui ad fidem veteris scriptoris *Archemachi* commemorat: „a Boeotis in Arnam colonia deduc-
„ta, nonnullos eorum, qui in Boeotiam non redierunt, avaritia &
„opportunitate loci collectos, se ipsos Thessalis in servitutem mancipasse,
„ea tamen lege, ut neque extra illam provinciam educerentur, neque a
„dominis interficerentur, ceterum se agrum dominis culturos, & annum pro-

c) Dionys. Hal. l. c. παρακαταθήκας δὲ ἔδωκε τοῖς πατρικίοις τὰς δημο-
τικούς, ἐπιτρέψας ἑκάστῳ τῶν ἐκ τῆς πλήθους ὃν αὐτὸς ἐβέλετο, νέ-
μειν προσάτην. ἔθος Ἑλληνικὸν καὶ ἀρχαῖον, ᾧ Θετταλοὶ τε μέχρι
πολλῶν χρόμων διέτελεσαν, καὶ Ἀθηναῖοι καταρχὰς, ἐπὶ τὰ
κρίττω λαβών. ἐκεῖνοι μὲν γὰρ ὑπεροπτιῶς ἐχρῶντο τοῖς πελά-
ταις, ἔργα τε ἐπιτάττοντες ἔ προσήκοντα ἐλευθέροις, καὶ ὅποτε
μὴ πράξιάν τι τῶν κελευομένων, πληγὰς ἐντείνοντες, καὶ τὰλλα
ὥσπερ ἀργυρωνήτοις χρόμων. ἐκάλουν δὲ Ἀθηναῖοι μὲν θήτας τὰς
πελάτας, ἐπὶ τῆς λατρείας. Θετταλοὶ δὲ, πενέτας, ἐνειδίζοντες
αὐτοῖς εὐθύς ἐν τῇ κλήσει τὴν τύχην.

d) Deipnos. lib. 6. p. 264.



„proventum reddituros, pollicitos esse, — — atque horum deinde multos, suis dominis ditiores factos esse“ Perperam Penestas Dionysium cum clientibus Romanorum comparasse Barbeyracius *e)* arguit, magnumque inter utrosque discrimen fuisse, Hen. Stephanum ostendisse ait, cuius cum mihi Schediasmata non ad manus sint, rem in medio relinquo. Ipse autem, eam patriciorum & plebis copulam Romulum a tam longinquis petivisse exemplis haud existimo, cum idem in Italia apud finitimos institutum viguisse videam: a Regillis enim oppido Sabinorum, Attam Clausum, gentis Claudiaie autorem Romam, vel iam Romulo regnante, vel exactis demum regibus, cum *magna clientum manu*, commigrasse Suetonius & Livius narrant. *f)*

Quam vero honesta apud Romanos fuerit illa utriusque ordinis conjunctio, vel ex ipsa ait Dionysius decora illius appellatione apparere. *g)* Romulus enim Patronatum vocari eam pauperum & tenuiorum tutelam voluit.

Mutua autem officia, quibus utramque partem perhumana atque civili copula inter se conjunctam esse voluit, trifariam dispertit Dionysius, *b)* ita, ut primum patronorum erga clientes: deinde horum erga illos: ac denique utrisque communia recenseat. Eodem nos quoque ordine observato, de primis primo loco dicemus.


Patro-

e) in gallica operis Grotiani de Iure Belli & Pac. versione lib. 2. c. 5. §. 30. n. 5.

f) Sueton. in Tiberio c. 1. Liv. lib. 2. c. 16.

g) Dion. Halic. l. c. ὁ δὲ Ῥώμυλος ἐπικλήσει τὸ εὐπρεπὲς τὸ πρᾶγμα ἐκίσμησε, Πατρωνίαν ὀνομάσας τὴν τῶν πενήτων καὶ ταπεινῶν προστασίαν.

b) ib. καὶ τὰ ἔργα χρησά προέθηκεν ἑκατέρω, Φιλανθρώπους καὶ πολιτικὰς κατασκευαζόμενος αὐτῶν τὰς συζυγίας.



Patronorum erat, ut clientibus de iure responderent, cuius illi scientiam nullam haberent. i) Est autem ius, siue de iure respondere, vel ipsas consultori leges edere, vel formulam agendi paciscendique legiti nam dictitare, ac monitis eum & consilio instruere, ne conditionem deteriorem faciat, tandem etiam obscuras interpretari leges si id desideretur. Iuris enim scientiam patricii olim plebem celarunt, & in possessione sua retinuerunt, eamque, obtinendae atque augendae potentiae suae causa, pervulgari noluerunt. k) Quantam amplissimi apud Romanos clarissimi que viri ab Iuris interpretatione & dignitatem & auctoritatem sibi quaesiverint, vel ex illo solo intelligimus, quod Crassus apud Ciceronem l) honestissimum illam celebrandae & ornandae senectuti praesidium, & domum Iureconsulti totius oraculum civitatis dicit, unde sibi consilium expeterent suarum rerum incerti. At alibi Cicero m) parum honorifice de illa iuris civilis scientia sentit, eamque tenuem vocat, quae res parvas tantum, prope in singulis litteris atque verborum interpunctionibus occupatas, contineret. „Etiam si, inquit, apud maiores „nostros aliquid fuit in isto studio admirationis: id, enuntiatis Iureconsultorum mysteriis, totum est contemptum & abjectum. Possset agi lege, nec „ne, pauci quondam sciebant, fastos enim vulgo non habebant. Erant in „magna potentia qui consulebantur: a quibus etiam dies, tanquam a Chaldaeis, petebantur. Inventus est scribe quidam, Cn. Flavius, qui cornicum oculos confixerit, & singulis diebus ediscendos fastos populo proposuerit, & ab ipsis cautis Iureconsultis eorum sapientiam compilarit. Ita, „que irati illi, quod sunt veriti, ne, dierum ratione pervulgata & cognita,

i) id-l. c. ἦν δὲ τὰ ὑπ' ἐκείνους τότε ὁρισθέντα μέχρι πολλοῦ παραμειναντα Ῥωμαίοις ἔθνη περὶ τὰς πατρωνίας τοιαύδε. Τίς μὲν πατρωνίας ἔδει τοῖς ἑαυτῶν πελάταις ἐξηγεῖσθαι τὰ δίκαια, ὧν ἐκ εἶχον ἐκεῖνοι τὴν ἐπιστήμην.

k) Cic. de Offic. l. 2. c. 19. & de Orat. l. 1. c. 41.

l) de Oratore l. 1. c. 45.


m) Orat. pro Murena. c. XL.



„ta, sine sua opera lege posset agi, notas quasdam composuerunt, ut omnibus in rebus ipsi interessent.“ Lepidum quod deinde subiicit, verbosae illius iuris scientiae exemplum, non transcribo, sententiam duntaxat Ciceronis de tota illa re addo: „ridicula iam tum ea credit apud illos barbatos, visa esse: ineptiis omnia fucata fuisse, quae tamen dum occulta essent, necessario ab iis, qui ea tenerent, peterentur: postea vero pervulgata, atque in manibus iactata & excussa, inanissima prudentiae reperta esse: fraudis autem, & stultitiae plenissima.“ Non piguit haec ex Cicerone integra apponere, cum iis, quae deinceps de abusu huius partis patrocinii dicentur, haud levem auctoritatem addere possint. Ad vanitatem autem, & formularum ineptias, tum potissimum verti coepit iuris scientia, cum, perlata post atroces contentiones lege Terentilla ⁿ⁾ plebs Romana potestatem patribus extorfisset, leges quas vellent, tacite perferendi. Antea enim, cum scriptis nondum Romani legibus uterentur, omne fere privati iuris arbitrium penes patricos fuit. In magistratibus enim constituti, quamcunque litigantibus sententiam pronuntiaverant, recte utique & ex lege pronuntiasse censebantur. dum enim ad naturalem iustitiam causas dirimebant, ob ipsam, quam sequebantur, aequitatem naturalem recte pronuntiasse videbantur: quoties autem iniquae eorum sententiae erant, si ad occultas, ut tunc solebant facere, provocabant leges, Romuli, Numae, Servii, & morem maiorum, nemo, plebejorum certe, propter iuris ignorationem, fraudis eos arguere poterat. Ut igitur illud, perlatis XII. Tabularum legibus, amissum iuris privati arbitrium recuperarent, novam patres rationem ineuntes, legis actiones, solennesque formulas, de quibus antea Ciceronem audivimus, invenerunt, atque per istud, quod prodere nefarium arbitrabantur, iuris & formularum arcanum, & per illam ius clientibus respondendi possessionem, plebem porro Romanam obnoxiam habuerunt. Quam autem scenica fuerit formularia illa iuris scientia, quamque ad fucum ignaris faciendum plane

com-

ⁿ⁾ Livius lib. 3. c. 9.



composita, vel ex ipsis videre est ritibus, quibus uti consultores oportuit, quosque in respondendo haud secus patroni custodivere, ac si neglectis iis, ipsa res clientum & salus periclitaretur. Taedet autem exempla transcribere, & paginae quoque angustia vetat: adeant interim quibus volupe est auctores in margine excitatos. o) Id vero transire nequeo, cum ad historiam instituti a Romulo patrocinii pertineat: Iureconsultos illos, qui se consulentibus ius respondere profitebantur, vicem paullatim veterum illorum patronorum in se suscepisse. Primum enim viri, qui famam singularis in iure peritiae adepti erant, operam suam consulentibus quibuscunque praebe- re, eosque etiam suos clientes appellare; mox etiam iuvenes admittere qui responsa notarent, ut ita una, & tradendi, & interpretandi iuris rationem discerent; p) alii deinde scriptis etiam declarare leges, nec a litigantibus so- lum, verum etiam ab ipsis iudicibus consuli, eoque eam sensim adipisci auctoritatem, ut responsa illorum ipsi iuri scripto accenserentur; fieri deni- que, at amissa demum republica libera sub imperatoribus, ut non cuivis, qui studiorum suorum fiduciam haberet, liberum esset se Iureconsultum profi- teri, sed eam ab imperatore ipso impetrare facultatem necesse esset. q) At- que eo vetus ille a Romulo institutus patronatus sensim exolevit.

De primo patronorum erga clientes officio satis dictum. Alterum, quod clientibus patroni debebant, fuit: r) „ Ut aequae praesentium & absen- tium curam gererent, omnia facientes, quae pro filiis patres solent, in „ne-

o) Heinecc. Syntag. antiq. Iurispr. illust. l. 1. T. 2. §. 33. Cic. Orat. pro Murena. c. 12. Barn. Brissou. de formulis lib. 3. no. 85. sqq. p. 313.

p) Heinecc. l. c. §. 43.

q) §. 8. Instit. de Iure N. & G. & l. 2. §. 47. D. de Orig. Iuris. Alex. ab Alex. Genial. Dier. l. 6. c. 23.

r) Dion. Hal. l. c. παρόντων τε αὐτῶν καὶ μὴ παρόντων τὴν αὐτὴν ἐπι- μελεῖσθαι τρόπον, ἅπαντα πράττοντας ὅσα περὶ παίδων πράτ- τουσι πατέρες, εἰς χρημάτων τε καὶ τῶν περὶ χρήματα συμβολαί- ων λόγον.

negotiis praesertim & contractibus ad opes & rem pecuniariam spectantibus.“ Non ergo consilio solum & iuris scientia, verum opera etiam, ac re patronum oportuit clientem iuvare. Est eius rei exemplum in Suetonio 1) ubi studium Caesaris & fidem erga clientes laudans, „nobilem, inquit, iu-
„venem Masintham adversus Hiempsalem, regem tam enixe defendit, ut
„Iubae regis filio in altercatione barbam invaserit, stipendiariumque pronun-
„tium, & abstrahentibus statim eripuit, occultavitque apud se diu, & mox
„ex praetura proficiscens in Hispaniam inter officia prosequentium, fasces
„que licitorum lectica sua avexit.“

Porro patronorum id etiam officium fuit: „ut lites pro clientibus iniuria afflictis, vel in contractibus laesis susciperent, vel in ius vocatos sustinerent, atque omnino vacationem qua maxime opus haberent, a privatis publicisque causis ac negotiis ipsis praestarent.“ Atque de hac patrocinii parte, honorifice admodum Cicero 2) loquitur, eamque, qua potissimum praestabatur, dicendi facultatem gravem & plenam dignitatis appellat, quae plurimas gratias, firmissimasque amicitias, & maxima studia pariat. Fuit quoque multorum in defendendis clientibus diligentia summa, quippe qua ad summos in republica magistratus viam sibi potissimum munivere novi homines, qui eniti in toga cuperent. A dicendis enim in foro causis initium plerumque illos cepisse, ut & clientes, amicosque plurimos sibi pararent, & eloquentiae famam quaererent, illustre Ciceronis exemplum testatur, & disertum auctoris Dialogi de causis corruptae eloquentiae testimonium confirmat. 3) Neque summos quidem viros clientibus adesse dedignatos esse in ipso

1) in Caesare c. 71.

2) Dion. Hal. l. c. *δικας τὲ ὑπὲρ τῶν πελατῶν ἀδικουμένων λαγχάνειν, εἴ τις βλάβη ποιοιτο περὶ τὰ συμβόλαια καὶ τοῖς ἐγκαλοῦσιν ὑπέχειν. αἷς δὲ εἰλίγα περὶ πολλῶν ἀντις εἶποι, πᾶσαν αὐτοῖς εἰρήνην τῶν τοῖς ἰδίων καὶ τῶν κοινῶν πραγμάτων, ἧς μάλιστα ἐδέοντο, παρέχειν.*

3) Orat. pro Murena. c. 11.

4) c. 36. toto.



in ipso Augusto w) exemplum habemus, qui scutario cuidam, evocato quondam suo, iniuriarum postulato adesse in iudicio haud gravatus est.

Constat autem mutatum sensim illum quoque esse morem maiorum, iam libera etiamnum republica, multo vero magis sub imperatoribus. Primum enim Iureconsulti illi, de quibus antea diximus, praeterquam quod de iure consulentibus respondebant, patronos etiam causarum in foro dicendarum se profitebantur, pollicebanturque, advocatos se adfuturos, quibuscunque nti opera sua placeret: quare etiam Advocati, Caussidici, & causarum Patroni dicti sunt potius, quam oratores x) Deinde, cum nobilissimum illud a Romulo institutum patrocinium paullatim mercenarium esse inciperet, alii quoque plurimi, licet eam studiorum suorum fiduciam minime haberent, ut ius respondere auderent, causas tamen coram iudice agere non erubuere. Artem autem hi ex Grammaticorum potius praeceptis hauriebant, quam ab exemplis petebant virorum, qui in comitiis & populi concionibus quondam exercitam eloquentiam habuerant, & quorum ingenia ac diligentiam in maximum propositi praemium summi civitatis honores excitaverant: nam caussidicos illos mercede conductos, nulla magnopere, neque clientelae necessitudo, neque causarum quibus patrocinebantur gratia, sed opima duntaxat merces plerumque stimulabat, cum plerique ei similes essent, qui in Plauto z) loquitur:

*Ut hoc utimur maxime more moro
Molestoque multum! atque ut quique sunt
Optumi maxumi, morem habent hunc:
Clientes sibi volunt esse multos.
Bonine an mali sint, id haud quaeritant,
Res magis quaeritur quam clientium*

Fides

w) Sueton. in Augusto c. 56.

x) Dial. de caus. corrupt. eloqui. c. 1.

z) in Menaechn. Act. 4. sc. 2.

Fides cujusmodi clueat.

Si est pauper atque haud malus, nequam habetur.

Sin dives malus est, is cliens frugi habetur.

Qui neque leges, neque aequum bonumque usquam

Colunt, sollicitos patronos habent.

Datum denegant quod datum est. litium

Pleni, rapaces, viri fraudulentis,

Qui aut foenore aut perjuriis habent rem

Partam. Mens est in querelis.

Iuris ubi dicitur dies, simul

Patronis dicitur: quippe qui pro illis

Loquuntur, male quae fecerint; aut ad

Populum, aut in jure, aut ad iudicem res est.


Atque mercedis hi causarum patroni ita plerumque avidi fuere, ut Tacito a) teste, imperante Nerone, haud quidquam publicae mercis tam venale fuerit, quam advocatorum perfidia, utque tum patres legem Cinciam flagitaverint, quae ipsa lex quondam a M. Cincio Alimento Tr. Pl. A. V. DCLIX. lata documento est, iam tum temporis patronos simili flagitio contaminatos fuisse; vetat enim lex, ne quis ob causam orandam dona ac munera caperet: oblitteratam illam Augustus denuo referre; Nero autem ei etiam obrogare necesse habuit, & cum a profligatis seculi sui moribus, ut integra observaretur, sperare haud sustineret, contentus fuit, pecuniae pro patrocinio capiendae modum statuuisse, ut ne dena sestertia egrederetur. b)

Haec de patronorum officiis. Nunc de clientibus videamus, primo qui ita apud Romanos vocati sint; deinde quae eorum officia fuerint; & quatenus denique illud Romuli institutum valuerit, dispiciamus.

Liberam

a) Annal. lib. II. c. 5.

b) Sueton. in Nerone c. 17. Tacit. l. 6. c. 7.



Liberam, Dionysius inquit, a Romulo plebejis optionem concessam esse, ut quemcunque e Patriciis vellent patronum sibi eligerent. Eam equidem intelligo optionem, non eo solum sensu liberam fuisse, ut nemini patronus obtruderetur quem nollet, sed ita etiam, ne omnino patronum sibi legere cogerentur ii, qui per se absque patroni ope se satis tutos arbitrarentur. Sub regibus quidem, & recentis adhuc reipublicae liberae tempore, paucos credo plebejos fuisse, qui nullum sibi e patribus patronum legissent, quod, qui, lectis a Romulo centum patribus, in illa novi populi colluvie superessent, omnes haud dubie pauperes & tenuiores erant. At postea, forsitan iam inde a Servii regis tempore, viluisse paulatim hoc Romuli institutum existimo, atque opulentos plebejos, se in patriciorum commendare clientelam dedignari, & per alium se tueri, subinde etiam deforme adeo & probro sibi habere coepisse. Argumenta quae, ut ita sentiam, me commovent fere haec sunt. In illa apud Dionysium c) oratione, quam Appium Claudium, facta prima plebis in montem sacrum secessione, in Senatu habuisse perhibet, eo, ut moderata Menenii Agrippae leniendae plebis consilia refelleret, inter alia Appius dissuadendi argumenta, illo etiam utitur: vereri se utique, ne, si iratae plebi cederent patres, postremo urbe ipsi pellantur, quemadmodum in aliis multis civitatibus, & novissime Syracusis acciderit, ubi agrorum possessores (*γεωμήτραι*) a colonis suis clientibus (*πρὸς τῶν πελατῶν*,) pulsi essent. Ex illa colonorum Syracusanorum ad clientes & plebem Romanorum facta comparatione probabile fit, etiam Romanos clientes colonos tantum fuisse, & patricios agrum Romanum fere solos possedisse, eiusque rei aliud argumentum acerrimas illas, a legibus agrariis postea inter utrumque ordinem coortas, contentiones esse arbitror. In lite illa, quam M. Claudius Appii Decemviri cliens, coram ipso illo Appio, Virginiae intentabat, ut virginem ingenuam in servitutem vindicaret, eamque deinde percito amore eius Decemviro traderet, ille fictam istam, non argu-

mentis

c) Antiq. Rom. lib. 6. p. m, 368.



mentis tantum & rationibus causam egisse, sed assiduas etiam preces addidisse dicitur: ne sui quam adversariorum minor ratio haberetur, quod cliens & humili loco natus esset. (*ἐν πελάτης ἦν, καὶ ταπεινὸς δ*). Ex illis equidem verbis colligo: clientes iam tum ex infima plebeiorum classe proletariorum & capite censorum potissimum fuisse, & divites plebejos, qui in continuis illis propter foenus, & nexos, & ob leges agrarias coortis contentionibus, plerumque a patriciorum partibus stabant, se raro in horum clientelam contulisse; neque enim illo argumento, ad sollicitandum Decemvirum M. Claudius usus esset, praesertim cum adversarii eius, Virginius pater, & Icilius sponsus virginis, & ipsi plebei essent, nisi id, in clientela patricii esse, hominis tenuioris & obscurioris indicium habitum fuisset. Porro, id etiam sententiae meae existimo vim aliquam, & pondus addere: quod ex Servii Tullii constitutione, manumissores libertorum suorum, & patroni erant, & dicebantur. Videtur enim Servius, cum tanti dominos beneficii in servos autores faceret, ut non libertatem tantum dare, sed civitatem simul cum libertate tribuere possent, firmiter utrosque inter se vinculo copulare voluisse, atque ea in re potissimum illud a Romulo institutum patrociniū secutus esse, ut simili manumissores cum libertis suis vinculo coniungerentur. Non equidem ignoro, fortius, & non benevolentiae tantum, verum etiam iuris istud arctum vinculum, inque illo multa fuisse, quae plane ab ingenuis clientibus abhorrerent; non enim liberam optionem habebant liberti, ut quem vellent patronum sibi eligerent, sed necessarius ipsis patronus, erat manumissor: iura quoque patronorum in liberos, agnatorum fere iuribus aequalia erant, neque poterat libertus, cui heres suus non esset, si testamentum conderet, patronum praeterire: praeterea alia quoque satis praeclara ad patronos iura, ex illa cum libertis copula pertinebant, quae utique patronis ingenuorum clientum non competebant. At opera, dona ac munera ingenuos quoque clientes, patronis debuisse certum est, & in aliis

d) Dion. Hal. l. c. p. m. 711.



aliis etiam amborum conditionem satis congruam, clientesque saepius cum libertis coniunctos invenio. e) Hereditarias quoque (de quibus infra Dionysii verba dabo) clientelas, plurimas certe, ex hoc manumissorum & libertorum vinculo originem traxisse, puto. Licet enim libertinorum filii ingenui, solutique essent arcto illo iuris vinculo, quo pater eorum, manumissori suo obstrictus fuerat; attamen plerosque nihilominus, grati animi causa, in clientela familiarum, quibus & libertatem, & civitatem acceptas ferebant, libenter perseverasse credo, praesertim cum inveniam, unam, initio, omnium ex servitute manumissorum, libertatem, & ius civitatis optimum libertis etiam concessum: iura autem Latinorum & dedititiorum serius demum reperta esse. f) In causa M. Claudii Virginiam in servitutem vindicantis, Appius Decemvir g) ait: „pater huius M. Claudii cum e vita excederet, rogavit me, ut filii sui quem puerum relinqueret tutelam susciperem, sunt enim clientes familiae nostrae iam inde a maioribus,“ qui locus haud obscure probare videtur: hereditarias clientelas, plurimas certe, a libertis ortas esse. cum enim liberti nomen manumissoris assumerent, videtur utique iste M. Claudius, Appii Decemviri cliens, & ipse libertinae conditionis homo origine fuisse. Ut igitur hereditarias eiusmodi clientelas consequerentur, praecipua videtur manumittendorum fervorum causa, eaque haud dubie satis honesta, inprimis, si ad turpes illas manumittendi causas, quae legi Aeliae Sentiae occasionem dedere, comparetur.

Sed

e) l. 3. D. de Ufu & Habitat. l. 5. §. 1. D. de his qui deiecerunt, vel effuder. l. 3. §. 6. D. de penu legata. l. 24. D. de Testibus. cet. idem quoque P. Pithoeum Annot. ad Tit. 9. Collat. Leg. Mosaic. & Roman. p. 174. docere, autorem sequor Cortium ad Sallustii Catil. c. 50.

f) Lib. 1. Tit. 4. Institut. Justin. Sigon. de antiq. Iure Pop. Rom. l. 1. c. 6. & lib. 2. c. 14. Institut. l. 1. T. 5. §. 3. a primis urbis Romae cunabulis una, atque simplex libertas competebat. i. e. eadem quam habebat manumissor: nisi quod scilicet libertinus sit qui manumittatur, licet manumissor ingenuus sit.

g) Dionys. Hal. l. 11. p. m. 716.



Sed ad officia, quae a clientibus patronis debebantur, transeamus. Ea, quorum expressa est mentio apud Dionysium, *b)* fuere haec: Ut patronis, quibus parum copiarum esset, in elocandis filiabus pecunias conferrent. Dotare enim filias, Romanis reipublicae expedire visum est, secus ac aliis gentibus. At in prima illa Romanorum paupertate, aes grave tantum dos fuit, illarum quoque, quae laute dotatae essent; mox decem millia aeris dotes non excessere: postea cum iam desidere veluti mores inciperent, quadraginta millia supergressae sunt, in tantum, ut, quod quinquaginta aeris millia dotem dederat, dotata ideo nomen Megulia ferret. *i)* Sed quamvis ea summa, in prisca illa paupertate, magna videretur, modica tamen fuit, ut quae plerorumque censum patriciorum, quos in prima vel secunda Servii classe fere omnes censos fuisse reor, non superaret. Itaque raram admodum huius officii occasionem clientibus fuisse puto, neque adeo miror, ita dotatae a clientibus filiae patroni exemplum mihi nondum occurrisse, nisi illud huc trahere libeat, quod cives collatam a se, in funus Menenii Agrippae, pecuniam, liberis deinde eius tradiderunt, cum ista sua in virum optimum caritate Senatui verecundiam fecissent, ut data ex aera-rio pecunia funus eius procurare iuberet. *k)* Contra autem sunt exempla aliquot tantae virorum consularium & patriciorum paupertatis, Valerii Poplicolae, M. Curii, Fabricii Luscini, Scipionis, ut filias illorum ab indotatis nuptiis, Senatus & aerarium vindicare opus haberent. *l)* At ipsis illis com-moveor exemplis, ut, cum viri illi haud dubie clientibus non caruerint, credam, Romuli illud institutum, collata a clientibus pecunia filias dotandi, in usu vel nullo, vel rarissimo fuisse. Et si, quae huius clientium erga patro-
nos

b) p. m. 84. τοὺς δὲ πελάτας ἔδει ταῖς ἑαυτῶν προσάταις θυγατέρας
τὲ συνεκδίδουσαι γαμουμένας, εἰσπανίζοιεν οἱ πατέρες χρημάτων.

i) Valer. Max. l. 4, c. 4. §. 10.

k) Dion. Hal. Ant. Rom. lib. 6. p. m. 416.

l) Val. Max. l. c. Alex. ab Alex. Genial. Dier. l. 4. c. 8.



nos officii vestigia superfunt, in donis ea nuptialibus superesse existimo; cum autem ea & liberti, & servi adeo, nonnunquam darent, ad novam id libertorum cum clientibus in eare similitudinem, novumque inde argumentum translati a Servio Romulei illius ad liberos instituti, trahere posse mihi videor.

Alterum, clientium erga patronos officium fuit: *m)* ut patronum, vel filium eius, captos ab hoste redimerent.⁴ Exemplum eiusmodi redemptionis a clientibus factae, equidem nullum inveni; inter ingentia autem beneficia, eam ex captivitate liberationem connumeratam esse, tum dura captivitatis bellicae mala, & magnum restitutae libertatis, amissaeque civitatis bonum, cuique facile persuadebunt, tum exempla quoque testantur, grati in Q. Terentio Culeone erga Africanum maiorem animi, & in duobus millibus civibus Romanis, quos Flamininus liberaverat, qui omnes pileati, currum triumphantium liberatorum comitati sunt, *n)* apparetque eiusmodi clientes tali redemptione etiam patronorum patronos videri potuisse.

Porro „clientes, privatarum litium aestimationes, & multas publicas „pro patronis solvere, idque sumtu proprio & gratis, non foenore praestare tenebantur. *o)* Memorabile huius rei exemplum apud Livium *p)* in M. Furio Camillo habemus, qui, cum dies ei, propter Vejentanam praedam a Trib. pl. L. Appulejo, dicta esset, domum tribules, clientesque, qui magna pars plebis erant, accivit, percunctatusque animos eorum responsum tulit: se collaturos quanti damnatus esset, absolvere eum non posse.

Utro-

m) Dion. Hal. p. 84 καὶ λύτρα καταβάλλειν πολεμίοις, εἴ τις αὐτῶν ἢ παίδων αἰχμάλωτος γένοιτο.

n) Val. Max. l. 5. c. 2.

o) Dion. Hal. p. 84. δίκας τὲ αἰλόντων ἰδίας ἢ ζημίας ἐφειλόντων δημοσίας ἀργυρικὸν ἐχούτας τίμημα. ἐκ τῶν ἰδίων λύεσθαι χρημάτων, οὐ δανείσματα ποιεῦντας ἀλλὰ χάριτας.

p) lib. 2. c. 32.

Utroque igitur illi officio, tum quod patrono debebant, mulctam conferendo, tum quo patriae obstrictos se putabant, non absolvendo Camillum, fungi voluerunt; at ille hoc audito in exilium potius abiit. Neque hoc loco praetereundum est, solitos fuisse clientes, ubi reus factus esset patronus, vel patroni gentilis eique dies dicta esset, vestem cum ipso simul mutare, & fordidatos cum gentilibus reliquisque rei necessariis, in comitio cives pressare, populi que implorare clementiam, & poenam deprecari, quemadmodum in populi de Appio Decemviro iudicio, C. Claudium fecisse apud Livium ^{q)} legimus.

Tandem „clientes etiam oportuit, patronum in magistratibus, & mun-
neribus publicis gerendis, ceterisque impendiis publicis sumtuum parte, non
„minus quam genere propinquos, sustinere.“ ^{r)} Utrum magistratibus apud
Romanos certa antiquitus stipendia & salaria data sint nec ne, definire
equidem, cum testimonia in neutram partem satis idonea habeam, non au-
deo, sunt autem rationes haud improbabiles, quae animum in posteriorem
magis, quam in priorem partem inclinent. Primum enim satis constat sti-
pendia militibus apud Romanos diu nulla fuisse, neque simile vero puto,
ut ducibus essent salaria, cum reliqui milites gratuitam Reipublicae militiam fa-
cerent: ex quo autem militibus, & equitibus stipendia data sunt, centurio-
rum quoque, & Tribunorum militarium ac Legatorum ab autoribus com-
memorantur stipendia, at, an ducibus etiam data sint, non dicitur. Dein-
de autem summorum apud Romanos virorum paupertas, ut T. Quinctii
Cincinnati, eiusque ad uxorem querela, cum consul absens creatus esset,
& a Senatu per legationem ex agro quem ipse colebat in urbem arcesseretur,
dicentis: ergo hoc anno agellus mihi non feretur, & de victu periclitabi-
mur:

^{q)} lib. 3. c. 58.

^{r)} ἐν τε ἀρχαῖς καὶ γενηφορίαις, καὶ ταῖς ἄλλαις ταῖς εἰς τὰ κοινὰ
δαπάναις, τῶν ἀνάλωμάτων ὡς τοὺς γενέει προσήκοντας μετέ-
χειν.



mur: s) Et M. Atilii Reguli exemplum t) qui, cum in Africa insolentissimae Carthaginis opes crebris victoriis contunderet, ac prorogatum sibi ob res bene gestas in proximum annum imperium cognosset, consulibus scripsit: villicum in agello, quem septem iugerum in Pupinia habebat, mortuum esse, occasionemque nactum mercenarium, amoto inde rustico instrumento discessisse, ideoque petere, ut sibi successor mitteretur, ne deserto agro non esset, unde uxor ac liberi sui alerentur; quae postquam Senatus a Coss. accepit, & agrum Atilii illico colendum locari, & alimenta coniungi, ac liberis praebere, resque quas amiserat, redimmi publice iussit: Illa ergo exempla argumento mihi sunt, ut existimem, nulla, tum certe, ne summis quidem magistratibus, gerendi muneris causa salaria ac stipendia fuisse, sed sumtus, quos reip. causa impendere opus haberent, aerarium praebuisse, atque praemii loco, eos praedae militaris pro se quoque partem, sicubi reliquis eam militibus dividerent, capere utique potuisse, quo iure suo saepe numero non utebantur, sed ne invidiae esset. vel integram in aerarium praedam inferre vel totam militibus distribuere potius habuerunt. Atque eam primorum magistratuum conditionem commovisse Romulum reor, ut in illa civitatis suae paupertate, clientibus id officium erga patronos imponeret, ut qui publice plebis & populi curam gererent, eos necessario ipsi sumptu iuvarent.

Recensitis hisce mutuis patronorum & clientium officiis, Halicarnassensis communia utrisque subiungit: „ne alteris accusare alteros: ne adversum dicere testimonium ferre suffragium fas & ius esset: utque inter inimicos cenferi improbum haberetur.“ u) Exemplum ad primum & secundum horum officiorum pertinens Cajus imperator praebuit, qui, ut Suetonius

s) Dion. Hal. l. X. A. R., p. m. 644.

t) Val. Max. l. 4. c. 4.

u) Dion. Hal. p. 84. κοινῇ δὲ ἀμφοτέροις οὔτε ἔσιον οὔτε θέμις ἢ κατατηγορεῖν ἀλλήλων ἐπὶ δίκαις, ἢ καταμαρτυρεῖν, ἢ ψῆφον ἐναντίαν ἐπιφέρειν, ἢ μετὰ τῶν ἐχθρῶν ἐξετάζεσθαι.

nus v) ait: „quo magis nullius non boni exempli fautor videretur, mulie-
 „ri libertinae octoginta donavit, quod excrucinata gravissimis tormentis, de
 „scelere patroni reticisset.“ De libertina id quidem dictum est, credo ta-
 men ex vetere instituto Romuli ductum esse, & patronos inter atque clien-
 tes multo etiam magis valuisse. De Augusto proditum legimus, w) T.
 Iunium Philopoemenem, quod patronum suum proscriptum celasse olim
 diceretur, equestri dignitate ab eo decoratum esse. Per ipsas quoque privati iu-
 ris regulas, adversa patronis clientium testimonia haud admittenda esse, inter-
 pretes x) statuunt, quia inter domesticos patronorum numerantur. Et
 Paulus y) inquit: lege „Iulia iudiciorum publicorum cavetur, ne invito de-
 „nuncietur, ut testimonium dicat, adversus focerum, generum, vitricum,
 „privignum, sobrinum, sobrino natum, eosque, qui propiore gradu sunt,
 „item ne liberto ipsius liberorum eius, parentum, viri, uxoris, item pa-
 „troni, patronae, & ne patroni, patronae adversus liberos, neque liberti
 „adversus patronum cogantur testimonium dicere.“ De patronis liberto-
 rum id quidem dictum est, sed haud dubie ex veteri illo vinculo patronorum
 & clientium derivatum. Valere etiam hanc Pauli sententiam ad eos, de
 quibus agimus, clientes, eam ob causam existimo, quod cognationes com-
 memorat, quibus, ut infra docebimus, necessitudo patronorum & clientium
 apud Romanos utique potior habebatur.

De sanctione, huius vinculi dicturus Dionysius z) pergit: „Quodsi
 „quis deprehensus esset horum aliquid facere, lege de proditoribus teneba-
 „tur,


v) in Caligula c. 16.

w) idem in Augusto, c. 27.

x) ad l. 24. D. de testibus.

y) l. 4. D. de Testib. Alex. ab. Alex. Gen. Dier. l. 3. c. 20.

z) Dion. Hal. l. c. εἰ δὲ τις ἐξελεγχθῇ τῶν τι διαπραττίμενος,
 ἔνοχος ἦν τῷ νόμῳ τῆς παροδοσίας, ὃν ἐκύρωσεν ὁ Ῥωμύλος. Τὸν δὲ
 αἰλόντα τῷ βουλευμένῳ κτείνειν ὅσιον ἦν, ὡς θῦμα τῷ καταχθονίου
 Διός. ἔθος γὰρ Ῥωμαίοις, ὅσους ἐβούλοντο νηποινὶ τεθνάναι, τὰ



„tur, quam sanxit Romulus, convictumque eius criminis cuius fas erat, ut
 „Diti sacrum, interficere. Mos enim erat Romanis, quos vellent impune
 „occidi, eorum corpora devovere Deo cuiusdam, praecipue Diis inferis,
 „quod tunc quoque fecit Romulus.“ Nullum mihi quidem severi eius ma-
 iorum moris exemplum obvenit; at constat legem illam Decemvirorum
 adhuc tempore vixisse, in fragmentis enim XII. Tabb. exstat Tab. VII. *Pa-
 tronus si clienti fraudem faxit, sacer esto.* & ex illo Virgilii *) loco, ubi *fraus
 innexa clienti*, in flagitiis Tartaro dignis connumeratur, apparet, quantope-
 re boni omnes id scelus averfati sint. Et Claudium Caesarem, a) ideo po-
 tissimum libertos ingratos, & de quibus patroni quererentur, in servitutem
 revocavisse reor, atrocemque eam ingratitudinem existimatum, quod, ut an-
 tea dixi, iura patronorum in libertos ad similitudinem veteris patrocini a
 Romulo instituti facta videntur.

Atque fortissimum illud initio vinculum fuisse, multa mihi, neque le-
 via argumenta persuadent. Verum enimvero in prisca republica, Patres
 omnium fere rerum potestatem parum regia inferiorem habuisse, neminem
 credo, nisi rerum Romanarum plane ignarum, fugere, & tum quoque cum
 iam suos plebs Tribunos haberet, qui curam eius & tutelam susceperet, omnia
 nihilominus diu patres potuisse. Illam autem potentiam ab hoc imprimis
 patrocini & clientelae vinculo mutuati sunt. Raro enim clientes suis a
 patronorum suffragiis abiisse, & plerumque etiam in contentionibus utrius-
 que ordinis, a patronorum partibus stare solitos fuisse Livius b) in causis
 Marcii Coriolani & Caesonis commemorat: „dispositis inquit, in Marcii
 „causa clientibus, absterrendo singulos a coitionibus conciliisque, rem pa-
 „tricii disicere tentabant.“ & in Caesonis causa ait: „iuniores etiam pa-
 „tricii,

τούτων σώματα θεῶν ὁπωδήτην, μάλιστα δὲ τοῖς καταχθονίοις κα-
 τοομαίξειν. ὃ καὶ τότε ὁ Ῥωμύλος ἐποίησε.

*) Aeneid. l. VI. v. 609.

a) Sueton, in Claudio c. 25.

b) l. 2, c. 35. & l. 3, c. 14.



„tricii cum ingenti clientium exercitu instructi paratique aderant, tribunos-
 „que adeo adoriebantur, ne lex Terentilla perferretur.“ In ipsis quoque
 comitiis Tribunorum creandorum, quum nondum tributis legerentur, ple-
 rumque quos patricii mallent creatos esse Tribunos, idem autor est. Nar-
 rationi enim de Voletonis ad populum rogatione, ut plebeji magistratus tri-
 butis comitiis fierent, subiicit: c) „haud parva res, sub titulo prima specie
 „minime atroci ferebatur, sed quae patriciis omnem fere potestatem, per
 „clientium suffragia creandi quos vellent tribunos, auferret.“ Per cliente-
 las denique Patres saepenumero telum, quo frequenter Tribuni in acri-
 bus secum certaminibus utebantur, feliciter obtulerunt. Cum enim delectum
 subinde Tribuni impedirent, plebemque ad nomina respondere vetarent, pa-
 tricios aliquoties solos, cum exercitu clientium & amicorum, hostibus urbi
 imminuentibus, & agrum Romanum populantibus obviam factos legimus. Ita
 Fabiam gentem, Veiens bellum in se susceptum, cum parvo quatuor circi-
 ter millium exercitu clientium & sodalium ad Cremeram gessisse; & Mar-
 cium etiam Coriolanum coacta amicorum & clientium manu adversus An-
 tiatem hostem prospere pugnasse invenimus. d)

Quam illud sanctum Romani vinculum habuerint, inde quoque colli-
 gimus, quod Halicarnassensis e) dicit: „per multas aetates permansisse mu-
 „tuam illam patronorum ac clientium copulam, haud secus quam cognat-
 „tae necessitudines per manus traditae. hereditarias enim plurimas clientelas
 „habere, easque non conservare solum, verum novis etiam propria vir-
 „tute

c) id. l. 2. c. 56.

d) Dion. Halic. l. 7. p. m. 469. & lib. 9. p. 573. Liv. l. 2. c. 49.

e) Dion. Hal. l. c. p. 85. τοῖς ἀρετοῖς διέμεταν ἐν πολλαῖς γενεαῖς οὐδὲν δια-
 φέροσαι συγγενικῶν ἀναγκαιοτήτων αἰ τῶν πελατῶν τε καὶ προσαι-
 τῶν συζυγίαι, παισὶ παίδων συνιστάμεναι καὶ μέγας ἔπαινος ἦν
 τοῖς ἐκ τῶν ἐπιφανῶν εἶκον ὡς πλείους πελάτας ἔχειν, τὰς τε προ-
 γονικὰς φυλαίτους διαδοχὰς τῶν πατρωνίων, καὶ διὰ τῆς ἐαυτῶν
 ἀρετῆς ἄλλας ἐπικτωμένοις.



„tute partis augere, magnam insignium ac nobilium familiarum Romae
„laudem fuisse.“

Testatur eam quoque huius vinculi sanctitatem ordo officiorum, quem Gellio teste f) viri sapientes constituere: ut *primum iuxta parentes locum pupilli tenerent, fidei tutelaeque nostrae crediti; secundum eos proximum locum clientes haberent, qui sese itidem in fidem, patrociniūque nostrum dediderint; tum in tertio loco ut hospites essent, postea demum cognati affinesque sequerentur*. Et quanquam alii, in illa officiorum & necessitudinum gradatione, nonnulla secus ac diximus collocant, in eo tamen haud discrepant: *clientes neque sine summa infamia deserui potuisse, & adversus cognatos pro cliente testandum, adeoque clientelae vinculum potius cognatione habendum fuisse*. Quam id minime absurde illi statuerint, egregie g) Vauchopius observat: *sunt enim, inquit, clientelae & hospitiae, vincula electionis, & libera; cognatio autem vinculum naturae, quod saepe cum indignis potest intercedere: quos autem libere eligimus, iis sanctam debemus fidem, eo magis, quod si eam praestare ipsis noluissemus, nihil nos cogit ad tale vinculum contrahendum*.

Pergit autem Dionysius in laudibus huius instituti a Romulo patrocini b), „ingens fuit, inquit, inter utrosque certamen ne vincerentur inmutua „gratia ac benevolentia, dum clientes omnia pro virili obsequia patronis praestare nitebantur; patroni vicissim ut molestiam fieri clientibus sinerent, nullis cor-

f) Noct. Attic. lib. 5. c. 13.

g) de Veter. populo Roman. in Thes. A. R. Graev. T. III. p. 1011.

b) l. c. p. 85. ὁ τε ἀγὼν ὑπὲρ τῆς εὐνοίας, ὑπὲρ τοῦ μὴ λειψθῆναι τῆς ἀλλήλων χάριτος, ἔκτοπος ἡλικίᾳ ἀμφοτέροις ἦν τῶν μὲν πελάτων, ἀπαντὰ τοῖς προσάταις ἀξιούντων, ὡς δυνάμεως εἶχον, ὑπηρετεῖν. Τῶν δὲ πατρικίων, ἡκιστὰ βουλομένων τοῖς πελάταις ἐνοχλεῖν, χρηματικὴν τε οὐδεμίαν δωρεὰν προσιεμένων. οὕτως ἐγκρατὴς ὁ βίος ἦν αὐτοῖς ἀπάσης ἡδονῆς καὶ το μακάριον ἀρετῇ μετρητὸν, οὐ τύχη.

lis corrumpi muneribus ac donis poterant. Tanta illis in omni vita temperantia a voluptate fuit, & felicitatem virtute non fortuna metiebantur.“ Satisne haec Dionysio testimoniorum fide explorata fuerint, uti equidem nunc non contendam, ita tamen dissimulare nequeo, satis mihi persuasum esse, patricios, fidem quam clientibus debebant, saepe cordi haud magno-
pere habuisse ne in primis quidem liberae reipublicae temporibus, & ple-
risque certe ordinis sui ac potentiae, rationes multo antiquiores fuisse. Nam cum rempublicam, quam regibus exactis instituerant, soli administra-
re laborarent, omnem animi sollicitudinem, & callida etiam subinde consilia, eo intendisse videntur, ut plebem plane sibi obnoxiam redderent: inde illa in nexos asperitas, ac plebis ex foenore calamitas: inde illa, in agrorum ab hoste captorum divisione, erga plebem malignitas: inde acerrimae illae cum Tribunis contentiones, frequentesque Romae seditiones, & aliquot etiam factae secessiones: ipsa illa iuris peritia, qua respondere clientibus te-
nebantur, quam turpiter abusi sint ad deludendam miseram plebem, cum supra dixerim non repetam. Nonne etiam illae plebis & Tribunorum cum patribus coortae contentiones de lege Terentilla, malignitatis hos in iure di-
cundo & in respondendo, arguunt? Nonne ipsa Tribunorum creatio, qui adversus magistratus superiores auxilio, plebeis tum universis tum singulis, essent, ostendit, quam infirma esset & parum fida patronorum tutela? quam-
que saepenumero iure suo magistratus abuterentur? Etenim Tribunos iam Coriolanus i) plebis patronos appellat, & constat eos, non in publicis so-
lum utriusque ordinis certaminibus, verum in causis etiam singulorum ci-
vium, plebis tutelam suscepisse. Quocirca me haud procul a vero abfuturum existimo, si statuam, iam inde a prima Tribunorum creatione, vetus illud a Romulo institutum patriciorum patrocinium, sensim evanescere, & ad eam paulatim deflectere indolem coepisse, quam postremis liberae reipublicae tem-
poribus habuit, cum non patriciae tantum, sed & plebeiae nobilium tamen
gentium

i) Dion. Hal. A. R. l. 7. p. 435.



gentium numero adscriptae familiae, potentiae potissimum & magnificentiae studio, clientelas quacerent, ut quemadmodum opibus, domo, paratu speciosae, ita & per nomen & clientelas illustriores haberentur *k)*


Antea tamen quam in illam luxuriam prolaberentur, ingens huic in deterius factae mutationi momentum ab ortis coloniarum, devictarumque urbium, & nationum patrociniis, adjectum esse equidem credo. De his exterorum clientelis Dionysius: *l)* „nec tantum inquit in ipsa urbe plebs sub „patriciorum erat patrociniis, sed & coloniarum, & sociarum civitatum, „& bello subactarum, suos quaeque habebat tutores ac patronos, quoscun- „que vellet e Romanis.“ De eadem quoque re praeclarum est testimonium Ciceronis *m)* „studebant, ait, magistratus Romani, imperatoresque ex hac „una re maximam laudem capere, si provincias, si socios aequitate & fide „defendissent. Itaque illud patrocinium orbis terrae verius, quam impe- „rium poterat nominari.“ Ad corpora quoque negotiatorum, & artificum collegia, tandem idem institutum processisse invenimus, cum nullum fere eorum esset, quod non patronos sibi Romanam quandam familiam adoptasset. Exempla eiusmodi patronorum, ex corporibus Inscriptionum Reinesii, & Gruteri collecta, videre est, apud Heineccium. *n)* Alia, quae mihi annotata sunt, ipse proferam, praesertim cum observationibus nonnullis inserviant, quae etiamsi haud novae, neque tamen alienae aut inutilis videbuntur. „Bononiensibus, Augustum publice, quod in Antoniorum „clientela

k) Tacit. Ann. l. 3. c. 55.

l) l. c. p. 85, ἐν μόνον δὲ ἐν αὐτῇ τῇ πόλει τὸ δημοτικὸν ὑπὸ τὴν προστασίαν τῶν πατρικίων ἦν, ἀλλὰ καὶ τῶν ἀπαίκων αὐτῆς πόλεως, καὶ τῶν ἐπὶ συμμαχία καὶ φιλία προσελθουσῶν, καὶ τῶν ἐκ πολέμου κεκρατημένων ἐκάστη φύλακας εἶχε καὶ προσάτας οὓς ἐβούλετο Ῥωμαίων.

m) de Offic. l. 2. c. 8.

n) in Syntagm. A. R. Iprud. illustr. l. 1. T. 2. §. 29.



„clientela antiquitus erant, gratiam fecisse, conjurandi cum tota Italia pro partibus suis,“ Suetonius o) dicit. qui locus duplicem ob causam memorabilis videtur: primo, quod Bononienſes in Antoniorum clientela fuiſſe, docet: deinde quod innuit, Bononienſes hoc clientelae vinculum apud Auguſtum praetendiſſe, eo, ne ab iſſis poſtularet, ut cum reliqua Italia pro partibus ſuis, adverſus patronum conjurarent, idque Auguſto vinculum, iuſtam ſatis excuſationem viſum fuiſſe, & cauſam idoneam, ad eam iſſis quam peterent gratiam faciendam. Fabiorum patrocinio civitatem Allobrogum plurimum uſam eſſe ex Salluſtio p) novimus; & Lacedaemonios in Claudiorum: Puteolanos in Caſſiorum: Siculos in Marcellorum, dein Scipionum, poſtea Metellorum, & demum etiam in Ciceronis clientela fuiſſe, Cortius q) annotavit, idoneiſque autorum teſtimoniis confirmavit: ſic Capuanos Ciceronem patronum habuiſſe, eique ſtatnam inauratam poſuiſſe iſſe r) prodit. Atque poſtrema haec patronorum Siciliae exempla, ideo etiam memorabilia ſunt, quod oſtendunt, & plebejos origine, quales Marcelli, ac Scipiones fuere, & novos adeo homines, qualis Cicero fuit, patronos provinciarum, & ſociarum civitatum electos eſſe, idque puto innuere velle Dionyſium, cum dicat: potuiſſe ſocias civitates ſibi e Romanis patronos legere quos vellent. non enim patricios dicit, ſed quos vellent: Quare in iſſa quoque urbe, jam diu non patricios ſolos, verum jam inde, ex quo promiſcui eſſe coeperunt magiſtratus ſuperiores, ut alia patriciorum iura ſenſim cum plebe communicata ſunt, ita credo, & plebejos origine homines etiam patronos legi potuiſſe, & lectos utique eſſe. Neque id annotaſſe piget: devictas plerumque civitates, iſſos a quibus devictae erant imperatores Romanos, patronos eligere ſibi, ſolitos fuiſſe. id enim Cicero s) diſerte teſtatur: *in quo.* (ſc. ne hoſtile quid in eos qui ſe dediderint ſtatuitur

o) in Auguſto. c. 17.

q) ad Salluſtii Catil. l. c. ſ. 4. in notis.

r) Oratt. in Piſonem c. 11. & pro Sextio c. 4.

s) de Offic. l. 1. c. 11.

p) in Catilina. c. 41.




tnatur, quanquam antea hostes fuerint) inquit, *tantopere apud nostros instituta culta est, ut ii, qui civitates aut nationes devictas bello in fidem receperissent, earum patroni essent more maiorum.* Ea autem patrocina haud hereditaria fuisse in primorum patronorum familiis, commemorata antea Sicularum exempla, & Capuanorum loquuntur.

Officium patronorum illorum fuit, ut coloniarum, urbium, collegiorum cet. negotia, in Senatu & urbe curanda in se reciperent, „& saepe numero Senatus controversias civitatum ad earum patronos remisit, eorumque iudicia rata habuit.“ ^{r)} Contra autem, clientium erat, ut diligenter patronos & assidue colerent, salutarent, deducerent. At, quam id etiam in deterius abierit, institutum, Ciceronem ^{u)} querentem audiamus: *sensim, inquit, hanc consuetudinem, & disciplinam iam antea minuebamus, post vero Syllae victoriam penitus amisimus: desitum enim est videri quidquam in socios iniquum, cum extitisset in cives tanta crudelitas.* Factum enim est, ut potentiae causa, quam plurimos tum in urbe, plebis potissimum urbanae, & turbae forensis, tum extra urbem, per Italiam imprimis, clientes, largitionibus, benignitatibus, novis coloniis deducendis, agrorum divisionibus, quorum veteres etiam possessores, si in aliorum clientela essent, migrare iubebant, sibi quaererent, quicunque factionem popularem fovebant, optimatibusque adversabantur, ac perniciosi consiliis publicae libertati insidiabantur. Sic enim, Claudium Drusum, legimus; ^{v)} statua sibi cum diademate ad Appii Forum posita, Italiam per clientelas occupare tentasse: Sic Syllam invenimus decies mille Cornelios, quos libertate & civitate donaverat, totidem satellites in urbe; veteranos autem, quibus per Italiam muni-

^{r)} Dion. Hal. l. c. p. 85. καὶ πολλάκις ἡ βουλὴ τὰ ἐκ τούτων ἀμφοισβητήματα τῶν πόλεων καὶ ἐθνῶν ἐπὶ τοὺς προϊσαμένους αὐτῶν ἀποσέλλουσα, τὰ ὑπ' ἐκείνων δικασθέντα κύρια ἤγειρε.

^{u)} de Offic. l. 2, c. 8,

^{v)} Appian. Civ. l. 1. p. 412.



municipiorum, & coloniarum, quae arma adversus ipsum tulerant, agros dividerat, paratissimum semper praesidium ad se tuendum habuisse. w) Sic deinceps Caesarem quoque, diviso XX. millibus civium, quibus terni, pluresve liberi essent, campo Stellate maioribus consecrato, agroque Campano, ad subsidia reipublicae vectigali relicto, fecisse constat, qui deinde totidem eius clientes essent, & omnes leges in eius consulatu perlatas, suis suffragiis sustinerent, ne abrogarentur: x) Ita denique Augustum, reductis, post victoriam Philippensem, in Italiam suis & M. Antonii veteranis, municipales divisisse agros, pulsus veteribus possessoribus, memoriae proditum est, eosque ipsos, postea evocasse, eorumque potissimum opera, & in Perusino, & in Acliaco bello usum esse.

Atque ita tandem Respublica interiit, & periit libertas, versumque in perniciem est, quod ingens diu, internae ac domesticae inter tot seditiones concordiae certumque satis praesidium fuerat. Idem ex Dionysio y) audiamus: „adeo, inquit, ab his initiis, autoritate Romuli exstructa, „inter Romanos, firma stetit concordiae consuetudo, ut nunquam inde per „sexcentos & triginta annos ad sanguinem, & mutuum caedem ventum sit, „quam-

w) Sueton. in Caesare. c. 20.

x) id in Augusto. c. 13.

y) l. c. p. 85. οὕτω δὲ ἄρα ἡ Ῥωμαίων βέβαιος ἦν ἡμένοια, τὴν ἀρχὴν ὑπὸ τῶν ἐκ τοῦ Ῥωμύλου κατασκευασθέντων λαβοῦσα ἑθῶν, ἅστε οὐδέποτε δι' ἁμαρτίας καὶ φόβου τοῦ κατ' ἀλλήλων ἐχώρησαν ὄντες ἑξακοσίων καὶ τριάκοντα ἐτῶν, πολλῶν καὶ μεγάλων ἀμφισβητημάτων γενομένων τῷ δήμῳ πρὸς τοὺς ἐν τέλει περὶ τῶν κοινῶν, ὡς ἐν ἀπάσαις φιλεῖ γενέσθαι μικραῖς τε καὶ μεγάλαις πόλεσιν. ἀλλὰ πείθοντες καὶ διδάσκοντες ἀλλήλους, καὶ τὰ μὲν εἰκόντες, τὰ δὲ παρ' ἐκόντων λαμβάνοντες, πολιτικὰς ἐποιῶντο τὰς τῶν ἐγκλημάτων διαλύσεις. ἐξ οὗ δὲ Γάιος Γράκχος ἐπὶ τῆς δημοκρατικῆς ἐξουσίας γενόμενος, διέφθειρε τὴν τοῦ πολιτεύματος ἁρμονίαν, οὐκέτι πέπαιυνται σφάττοντες ἀλλήλους, καὶ φυγάδας ἐλαύνοντες ἐκ τῆς πόλεως, καὶ οὐδενὸς τῶν ἀνηκέστων ἀπεχόμενοι παρὰ τὸ νικᾶν.



„quamvis multae & magnae inter populum controversiae de republica ori-
 „rentur, sicut in omnibus tam parvis quam magnis civitatibus solet: sed
 „persuadentes alias, & alias se mutuum edocentes; nonnunquam conceden-
 „tes, vel a non repugnantibus impetrantes, exortas civiliter querelas diri-
 „mebant. Ex quo autem C. Gracchus potestatem tribuniciam nactus civi-
 „lem distraxit concordiam, nondum desierunt in se mutuis caedibus saevire,
 „& in exilium se invicem ex urbe abigere, & omnem insaniam perpetrare:
 „propter victoriam,“

Ad vanitatem tandem & luxuriam deflexit nobile illud Romuli institu-
 tum, & vile admodum factum est clientelae vinculum, ut cum servis adeo clien-
 tes, ante fellas & lecticas mollium & ambitiosorum patronorum incederent:
 Multos etiam misera sportula, quam distribuere patroni solebant, vel coena
 sordida, quam dabant, allexit, ut clientes sese addicerent patronis in luxu
 & ambitiosa pompa viventibus. Statuis quoque in honorem patronorum
 erectis, atria patronorum exornare solitos fuisse clientes Plinius ²⁾ autor est: *mox*
enim, ait, *forum & in domibus privatis factum, atque in atriis*. *Honos*
clientum instituit sic colere patronos, & alibi, ^{*)} ubi de statuis publice Ro-
 mae positis loquitur: *passim*, inquit, *gentes in clientelas receptae posuerunt*
patronis. Turbam illam clientium, de qua antea diximus, quae patronos
 comitabatur, *togatam* poetae & *albam* dicunt, ut a servis eam discernant; &
salutatricem, quod summo mane ad divitum fores praestolabatur, & luce
 adhuc dubia, vix bene amictu corpore adesse festinabat; cum maximae sibi
 laudi ducerent clientes, qui primi ad salutandum patronum comparuissent.
 Matronas tandem Romae eiusmodi clientelas quoque habuisse, atque uxores
 clientum, itidem salutatum comitatumque ivisse patronorum uxores, iisque
 arte, & operibus inserviisse, clientasque dictas esse & Horatius ^{**)} & Ju-
 venalis ^{***)} autores sunt.

Sed

2) Hist. Nat. lib. 34. cap. 9.

*) id. ib. c. 15.

**) Carin. I, 2. od. 18.

***) Sat. 10.



Sed tempus est, ut finem & modum tractationi imponam; adeant qui plura de illa Romanorum luxuria cupiunt autorem infra excitatum. †)

Addam nunc argumenta orationum, quas ordine, quo nomina eorum edidi, habebunt, *ornatissimi adolescentes*, non ingenii tantum dotibus, & litterarum amore, assiduaque diligentia, sed morum imprimis quoque probitate & indole ingenua ad virtutem haud dubie inclinata propensaque, maximopere commendabiles.

GEORGIUS CAROLVS HEDEMANN Herrmansburgo-Cellensis, *de praestantia propensae ad virtutem indolis, deque excellenti eius fructu, iam inde a prima pueritia per omnem reliquam vitam percipiendo, oratione vernacula & suapte ingenio elaborata:*

LVDOLPHVS FRIEDERICVS CORDEMANN Hannoveranus *de utilitate ex Fabularum Graecarum studio in virtutis etiam disciplina capiendu, oratione latina ab ipso elaborata, dicent, &*

ALBERTVS FRIEDERICVS LVDOLPHVS LASIVS Cellensis: *Nullam absque virtute veram felicitatem intelligi, & neminem in quo virtus sit, plane miserum esse, carmine vernaculo, modo forsan non omnino vulgari, canet.*

Ad benevole audiendas orationes illas TE ILLVSTRIS DUVE, TEQVE ILLVSTRIS HEYNE quorum tutamini & patrocinio, hoc Paedagogium & salutem debet, & laetum illum, in egregio selectu, adolescentum ingenuorum litterarum amore ardentium, ac coniuncta cum morum probitate elegantia conspicuorum, potissimum situm florem: Vos inquam

†) Stanisł. Kobierzyckium, de Luxu Romanor. in Theſ. A. R. Graev. Tom. VIII. p. 1332.

inquam QVIBVS, in solenni hac Paedagogii illustratione, commemorati
antea adolescentes, & ingenia, & impensam litteris operam adprobare
inprimis gestiunt, demissa equidem mente invito, ut benigne adesse, VE-
STRAQUE praesentia nostrorum excitare porro & acuerre studia haud
gravemini.

Reliquos etiam PATRONOS ac FAVTORES, qui rebus nostris
ac studiis favent; ut & CLARISSIMOS IVVENTVTIS MAGISTROS,
COLLEGAS HONORATISSIMOS; AMICOS omnes; & ORNATIS-
SIMOS denique COMMILITONES; qua queminque decet veneratione,
observantia, studio & affectu, ut hunc actum frequentia SUA celebrare,
ornare, ac nostrorum exercitationes favore suo adiuuare velint, rogo
atque invito.

